

Lajčák u Parizu: izborna kampanja se mora baviti životnim pitanjima građana



Visoki predstavnik i specijalni predstavnik EU Miroslav Lajčák sastao se danas sa visokim zvaničnicima u Parizu kako bi ih informirao o pomacima koje je načinila BiH u ispunjavanju pet ciljeva i dva uvjeta za tranziciju OHR-a u EUSR. “Bosna i Hercegovina je napravila dobre pomake u posljednjih nekoliko mjeseci, ali potrebno je uložiti nove napore na dva ključna pitanja: budući status Brčkog i reguliranje državne imovine”, Lajčák je izjavio Predsjedništvu EU, koje ima ključnu ulogu u koordiniranju politike EU prema Bosni i Hercegovini.

Govoreći o početku izborne kampanje za općinske izbore u BiH, visoki predstavnik i specijalni predstavnik EU naglasio je da očekuje da svi političari vrše kampanju koja će se baviti pitanjima koja se odnose na potrebe lokalnih zajednica. Lajčák je informirao francusko Predsjedništvo EU da je evidentno iz sastanaka koje je održao u posljednjih nekoliko mjeseci da ogromna većina građana BiH želi da se njihovi politički lideri suzdrže od negativnih političkih kampanja i da se bave životnim pitanjima, kao što su nezaposlenost, socijalna prava, korupcija, kriminal i obrazovna reforma, kako bi zemlju brzo povelj prema Evropskoj uniji.

Lajčák je također naglasio da očekuje da svi kandidati i stranke poštuju izborna pravila i izbjegavaju huškačku retoriku, podsjećajući da je Vijeće za implementaciju mira uvjetovalo tranziciju OHR-a u EUSR pozitivnom ocjenom političke situacije u Bosni i Hercegovini.